

太上正一晚課

香讚

玉檀香燼 朝罷楓宸 瓊臺演法度群生 超
出苦迷津 萬類幽靈 煉質化成人
十方救苦無上大天尊 三稱

啟經

大道洞玄虛 有念無不契 鍊質入仙真
遂成金剛體 超度三界難 地獄五苦解
悉皈太上經 靜念稽首禮 太乙救苦尊

開經咒

寂寂至無宗 虛峙劫仞阿 豁落洞玄文
誰測此幽遐 一入大乘路 孰計年劫多

不生亦不滅 欲生因蓮花 超凌三界途
慈心解世羅 真人無上德 世世為仙家

太上洞玄靈寶十方救苦拔罪妙經

爾時

救苦天尊	遍滿十方界	常以威神力
救拔諸眾生	得離於迷途	眾生不知覺
如盲見日月	我本太無中	拔領無邊際
慶雲開生門	祥煙塞死戶	初發玄元始
以通祥感機	救一切罪	度一切厄
渺渺超仙源	蕩蕩自然清	皆承大道力
以伏諸魔精	空中何灼灼	名曰泥丸仙
紫雲覆黃老	是名三寶君	還將上天炁
以制九天魂	救苦諸妙神	善見救苦時
天上混無分	天炁歸一身	皆成自然人

自然有別體 本在空洞中 空洞跡非跡
遍體皆虛空 第一委氣立 第二順氣生
第三成萬法 第四生光明 天上三十六
地下三十六 太玄無邊際 妙哉大洞經
皈命 太上尊 能消一切罪

東方玉寶皇上天尊

南方玄真萬福天尊

西方太妙至極天尊

北方玄上玉宸天尊

東北方度仙上聖天尊

東南方好生度命天尊

西南方太靈虛皇天尊

西北方無量太華天尊

上方玉虛明皇天尊

下方真皇洞神天尊

道言

十方諸天尊 其數如沙塵 化形十方界
普濟度天人 委炁聚功德 同聲救罪魂
罪魂實可哀 我今說妙經 念誦無休息
歸身不暫停 天堂享大福 地獄無苦聲
火翳成清暑 劍樹化騫林 上登朱陵府
下入開光門 超度三界難 逕上元始天
於是飛天神王 無鞅聖眾 瞻仰

尊顏 而作頌曰

天尊說經教 接引於浮生 勤修學無為
悟真道自成 不迷亦不荒 無我亦無名
朗誦罪福句 萬遍心垢清

爾時

飛天神王 及諸仙眾 說是經畢 稽首天尊
奉辭而退

太上洞玄靈寶十方救苦拔罪妙經 竟

元始天尊說升天得道真經

爾時

元始天尊 在大羅天上 玉京山中

為諸天仙眾 說此升天得道真經

告諸仙曰 吾今為汝略啟身心 明宣道要

十方得道神仙 皆從此經修行 而通微奧

善男子 善女人 依憑齋戒 作是津梁

一切有為 顯諸真路 體此法相 乃可受持

能屏眾緣 永除染著 外想不入 內想不出

於正念中 乃得五臟清涼 六腑調泰

三百六十骨節之間 有諸滯礙 十惡之業

百八十煩惱之業 眾苦罪源 悉皆除蕩

即引太和真炁 注潤身田 五臟六腑

心目內觀 真炁所有 清淨光明 虛白朗曜

杳杳冥冥 內外無事 昏昏默默 正達無為

古今常存 總持靜念 從茲解悟 道力資扶

法藥相助 仍接飲食 驅遣鬼尸 安寂六根

靜照八識 空其五蘊 證妙三元 得道成真

自然昇度 爾時 諸天仙眾上白天尊言

自從無始以來至于今日 未聞如是大乘經典

我等緣茲幸會 廣及一切 道果圓明

而說偈曰

杳杳冥冥清靜道 昏昏默默太虛蹤

體性湛然無所住 色心都寂一真空

元始天尊說升天得道真經 竟

太上道君說解冤拔罪妙經

爾時

太上道君與諸聖眾 在八騫林下 七寶臺中

羅列威儀 敷陳道要 怡神默坐 如玉京山

放七寶光明 照福堂地獄 見福堂之內

男女善人 快樂無為 逍遙自在 復見諸

地獄之中 餓鬼窮魂 以日繼夜受種種苦惱

悉無人形 五體壞爛 饑滄猛火 渴飲熔銅

足履刀山 身負鐵杖 遍體流血 悲號徹天

是時 會中有一真人 名曰廣信 從座而起

稽首前進 上白 道君曰 不審此輩窮魂

生有何咎 而受茲苦

道君曰 受諸罪者 在世之時 不敬三光

欺負神理 十惡五逆 不忠不孝 不慈不仁

毀傷物命 殺害眾生 福盡壽終 當受斯苦

是時 廣信真人 心生哀憫 欲其濟拔

幸望妙力威光 許令開度 伏蒙道君

垂賜金言 廣設法要 為諸眾生 演說是經

名曰解冤拔罪 流佈于世 利益存亡

若有善男子善女人 一心專志 入靜持齋

焚香行道 六時轉念是經 吾當隨願

保佑其人 使宿世冤仇 乘福超度

幽魂苦爽 各獲超昇 真人廣信 歡喜再拜

覩縷勝因 而作頌曰

偉哉大道君 常普無量功 舟楫生死滿

濟度超羅剎 罪對不復遇 福報與冥通

用神安可測 贊之焉能窮

是時 廣信真人與諸聖眾 聞法將畢

各各稽首皈依 信受奉行

太上道君說解冤拔罪妙經 竟

元始天尊說功德法食往生經

爾時

元始天尊與諸天聖眾 天仙地仙 三界官屬

五岳地司 五帝水府 北都羅酆善惡二童子

游東方玉寶樓閣世界 空青樹下 碧蓮花上

說十種因緣 一千業報 令諸法會生解脫心

爾時 天尊現大光明 滿彼世界 見諸地獄

餓鬼畜生 頭面焦爛 身體火然 刀輪劍鋒

苦毒徹天 痛傷骨髓 猛火焰天 渴飲熔銅

號叫冤債 無有休息 是時眾中 普皆觀見

爾時 有一真人 名曰大慈大慧 悲泣傷嘆

從座而起 稽首斂容禮拜 上白天尊

伏願聖慈 特垂聽覽 臣與法會諸眾
及飛仙神仙等 憫恤下界眾生 伏願天尊

平等大慈 如何救度 爾時

天尊默然良久 方啟慈顏 舉五明扇

發大弘音 乃答真人曰 善哉善哉

汝等廣為眾生 憫啟慈念 今問此事

令我應見 汝等一會 當須諦聽

天尊言 三途九府 一百二十艷都地獄

有諸眾生 不修真道 死入長夜 魂為下鬼

沉淪惡趣 愍嘆而作頌曰

冷冷甘露滋 法味難思議 騫香流七真

冥冥何生疑 受此法食者 生天登紫微

福田高巍巍 供施令清靜 一切有為事

普皆成代命 拔汝三途苦 施汝九玄慶

臨當受食時 諸天皆贊詠 寒庭多悲苦
回心禮元皇 女青靈寶符 中山真帝書
一念昇太清 再念歸太無 功歸九幽下
旋旋生紫虛

天尊曰 施食與亡者 不可思議 是諸亡魂
是男是女 當此飽滿 各得離苦解脫

受清涼蓮花座 永得脫離 是時

天尊重宣偈曰

功德不思議 行者膺福報

施與法食餐 永生安樂道

爾時

天尊說是偈已 應諸所見地獄 尋聲消散

是諸幽魂 隨願往生 大慈大慧真人及

諸法會等眾 咸皆歡喜踴躍 五體投地

作禮而退 信受奉行

元始天尊說功德法食往生經 竟

太乙救苦天尊說拔罪酆都血湖妙經

爾時

救苦天尊 遍滿十方界 會集十方天尊仙眾

說諸因緣 時有妙行真人 出班奏白

臣今下觀欲界 酆都羅山 血湖二十四獄

鋒刀十八地獄 大鐵圍山無間地獄

三河四海九江泉曲地獄 猛津洪波流沙地獄

或則熔銅灌口 或則利鋸解形

抱銅柱以皮焦 臥鐵床而肌爛 遍體刀割

百節火燃 鐵杖銅錘 縱橫拷掠 如斯苦痛

無有休息 爾時 妙行真人 十方仙眾告

天尊曰 善哉善哉 皆緣前生今世

故作悞為 悖逆叛常 負命欠財 墮胎損子
血湖產亡 夭橫隕滅 冤讎不解 罪積丘山
沉于地獄之中 血湖血井血池血碓
受諸痛苦 萬劫難外 今幸遇天尊
發大慈悲 開大法門 普集十方一切神仙
宣演妙法 普救群生 救一切罪 度一切厄
出離長夜 得睹光明 萬罪蕩除 冤讎和釋
鑊湯火翳 變作蓮池 劍樹刀山 翻成花圃
赦種種之罪愆 從茲解脫 宥冥冥之長夜
俱獲超昇 而作頌曰
天尊大慈悲 普濟諸幽冥 十方宣微妙
符命敕泉扃 拯拔三途苦 出離血湖庭
沉魂滯魄眾 男女總超昇
太乙救苦天尊說拔罪酆都血湖妙經 竟

經讚

十方救苦 得道升仙 饑虛飽滿盡皆歸
法食廣無邊 硤石生蓮 冤債皆無孽
大聖隨願往生大天尊（三稱）

斗姥寶誥

志心皈命禮

西天竺國 大智光中 真空妙相法王師
無上玄元天姥主 金光爍處 日月潛輝
寶杵旋時 鬼神失色 顯靈蹤於塵世
衛聖駕於閻浮 眾生有難若稱名
大士尋聲來救苦 大悲大願 大聖大慈
大梵先天斗姥 紫光金尊 聖德巨光天后
摩唎中天大聖 圓明道姥天尊

三官寶誥

志心皈命禮

唯三聖人 乃一太極 普受浩劫家之命
鼎膺無量品之褒 紫微清虛洞陰 總領功過
賜福赦罪解厄 溥濟存亡 道冠諸天
恩覃三界 大悲大願 大聖大慈 三元三品
三官大帝 三宮九府 應感天尊

玄天上帝寶誥

志心皈命禮

混元六天 傳法教主 修真悟道 濟度群迷
普為眾生 消除災障 八十二化 三教師祖
大慈大悲 救苦救難 三元都總管
九天遊奕使 左天罡 北極右垣大將軍
鎮天助順 真武靈應 福德衍慶 仁慈正烈
協運真君 治世福神 玉虛師相
玄天上帝 金闕化身 蕩魔天尊

祖天師寶誥

志心皈命禮

本來南土 上溯蜀都 先獲黃帝九鼎之丹書
后侍老君兩度于玉局 千軸得修真之要
一時成吐納之功 法籙全成 受盟威品
而結璘訣 正邪兩辨 奪福庭治 而成咸泉
德就大丹 道齊七政 大悲大願 大聖大慈
三天扶教 輔玄體道 大法天師 雷霆都省
太玄上相 都天大法主 正一沖玄神化
靜應顯佑真君 六合無窮高明大帝
降魔護道天尊

葛仙翁寶誥

志心皈命禮

天臺得道 閻皂成真 昔受東華
復轉西蜀 詔命玉京金闕 位登太極仙班

慈憐拯拔于沉淪 恩念普資于苦爽
葛天氏遺風顯著 勾漏令丹砂俱存

括蒼仍游 羅浮乃止 修間玉_靈 修理金書

大悲大願 大聖大慈 太上玉京 東吳太極

左宮仙翁 雷霆玄省 天機內相 玉虛紫靈

普化玄靜 常道沖應 孚佑真君 垂恩廣救

慈悲大帝 度人無量天尊

薩祖寶誥

志心皈命禮

派流西地 跡顯龍興 施財合藥濟群生

積行累功修至道 授鐵師之教旨

掌玉府之雷書 身披百衲伏魔衣

手執五明降鬼扇 代天宣化 咒棗書符

運風雷于咫尺之間 剪妖魔于斗罡之下

道參太極 位列先天 松筠野鶴任縱橫

遐邇孤雲常自在 方方闡教 為萬法之宗師
處處開壇 作後人之模範 都天宗主
一元無上真君

東岳寶誥

志心皈命禮

赫天玄英之祖 金輪少海之宗

彌仙母夢日光生 紫府聖人東華帝

昔建功於長白 始受封於羲皇

初號太華真人 漢名泰山元帥

唐惠崇恩聖帝 聖朝敕賜大聖 位鎮坤維

功參乾造 凡居品位 悉皆蒞焉 仁以得仁

回陽春於掌上 聖心蓋聖 麗日月於天中

五岳稱讚於東方 三界獨尊於中界

仰舉行於天令 俯糾察於陰司

掌人間善惡之權 司天下生死之柄

懲奸惡而獄分三十六署

稽吉凶而判斷七十二曹

行善者注生天堂 沉迷者尋聲救苦

示慈尊垂慈之相 開生生化生之門

福與天齊 功高無量 大悲大願 大聖大慈

中界至尊 東嶽聖帝 慈光救苦

威權自在天尊

太乙寶誥

志心皈命禮

青華長樂界 東極妙嚴宮 七寶芳騫林

九色蓮花座 萬真環拱內 百億瑞光中

玉清靈寶尊 應化玄元始 浩劫垂慈濟

大千甘露門 妙道真身 紫金瑞相

隨機赴感 誓願無邊 大聖大慈 大悲大願

十方化號 普度眾生 億億劫中 度人無量

尋聲赴感 太乙救苦天尊 青玄上帝

法 食 讚

靈音到處 滅罪消愆 玉訣玄妙施法宴

普濟利群生 願皆飽滿 幽孤盡昇薦

皈命 法食飽滿大天尊

※加持斛食經咒 引磬誦念 高功判食

天尊開方便 拔度眾幽魂

鐵圍一時破 究竟令清淨

無量度人元始天尊 無量度人靈寶天尊

無量度人道德天尊 太乙尋聲救苦天尊

太極南煉葛翁真人 西河救苦薩公真人

十方救苦真人 十方救苦童子

一聲清磬

一聲清磬醒塵寰 嘆雲煙過眼世界漫漫
功名富貴 都是苦海迷關 說什麼英雄意氣
說什麼兒女欣歡 人生縱有計千般
到如今黃沙白骨荒塚青山 幸今宵慈航接引
須極早皈依正果覓取金丹

一炷道德香

一炷道德香 同登三境路 天尊 大慈悲

宣揚秘密語 普度眾孤魂 脫離三途苦

三途苦 最苦是孤魂

孤魂真最苦百年幻化夢中尋

一息 不來歸何處 歸何處黃泉黑壤路渺茫

春秋 祭祀誰為主 誰為主 今夜召汝來

召汝餐甘露今夜召汝來召汝來餐甘露

酆都咒

茫茫艷都中 重重金剛山 靈寶無量光
洞照咸池煩 九幽諸罪魂 身隨香雲幡
定慧青蓮花 上生神永安 功德金色光
微微開幽關 華池流真香 蓮蓋隨雲浮
千靈重元和 常居十二樓 急宣靈寶旨
自在天堂遊

皈命 開通冥路大天尊

五 廚 經

一炁和太和 得一道皆泰 和乃無一和
玄理同玄療 不意以思意 意不求無思
意而無有意 如法如是持 莫將心緣心
還莫住絕緣 心在莫存心 真則守真緣
修理志離志 積修不符離 志而不修志
己業無己知 諸食氣結炁 非諸久定結

氣歸諸本氣 隨取當隨洩
浩精生法炁 氤氳凝天中 兩曜共澄澈
五緯夜相通 三光渙已明 寶氣凝三宮
帝鄉會九老 咽服百骸豐 金華照光景
身與日月同 念道上聖前 萬劫壽無窮
悲夫長夜苦 熱惱三途苦 猛火入咽喉
長生饑渴念 一灑甘露水 如熱得清涼
二灑甘露水 沉魂昇大羅 三灑甘露水
潤及于一切 清涼甘露 清涼甘露天尊
三天無量食 充滿法界中 濟汝饑渴者
清淨無色身

唵薩摩薩摩 摩啼摩啼 薩摩薩摩

宸摩啼摩 啼敕啼敕 嚙極三天 敕摩敕摩
三天啼 三天啼 唵敕吽 勤修大道法

頓息塵埃皈正道 度化眾生昇仙界

※施食完畢 轉入轉天尊

太乙救苦天尊

發願文

弟子眾等志心發願

一願元始頒命 二願幽暗開光

三願金籙度命 四願黑簿除愆

五願苦海息浪 六願火獄停煙

七願風雲平暴 八願怡神快樂

九願解釋冤愆 十願法食馨饗

再願聞經悟道 更願亡者昇天

法眾虔誠 同登道岸

願滅三障諸煩惱 願得智慧心明了

普願災障悉消除 世世常行無上道

四恩三有均利益 十州三島任逍遙

回相四府眾龍神 禮謝道經師三寶

向來誦經福無邊 風調雨順民安樂

願以此功德 普及於一切

誦經保平安 消災增福壽

頌 讚

青華教主 太乙慈尊 玉清應化顯金身

大開甘露門 接引眾生 永出愛河津（重一句）

王天君誥 志心皈命禮

先天主將 一炁神君 都天糾察大靈官

三界無私猛烈將 金睛朱髮

號三五火車雷公 鳳嘴銀牙

統百萬貔貅神將 飛騰雲霧

號令雷霆 降雨開晴 驅邪治病

觀過錯於一十二年 受命玉帝
積功勳於百千萬劫 誓佐祖師 至剛至勇
濟死濟生 方方闡教 處處開壇 豁落猛吏
三五火車大靈官王天君 太乙雷聲應化天尊

土地神咒

此間土地 神之最靈 昇天達地 出幽入冥
為吾關奏 不得留停 有功之日 名書上清

回壇(一)

破諸幽獄地花開 太上慈悲接引來
度盡蒼幽生淨土 逍遙快樂昇仙都

(二)

救苦天尊誓願深 妙法破開地獄門
若要孤魂昇仙都 大眾回壇念天尊

太上正一晚課終

向來晚堂誦經功德上奉慈尊下濟幽冥

脫化仙鄉同賴善果證無上道一切信

禮志心稱念

十方救苦天尊不可思議功德

願消三障諸煩惱 願得智慧證盟了

普願災障悉消除 世世常行無上道

四恩三有均利益 十洲三島任逍遙

回向四府眾龍神 禮謝道經師三寶

課誦圓滿福無邊 風調雨順民安樂

自皈依道當願眾生超脫一切住最上乘

自皈依經當願眾生深明經藏神通莫測

自皈依師當願眾生太上授首成大仙道

稽首

聖眾

收經讚

誦經功德不可思議諸天諸地轉靈機

國運壽夭齊大道慈悲萬化樂雍熙

玄門晚課終 竟